

97 J 15.10.2015  
կայ: 11815420



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՖԻՆԱՆՍՆԵՐԻ ՆԱԽԱՐԱՐ**

« 11 » սեպտեմբերի 2015թ.

№ 624-Ն

**ՀՐԱՄԱՆ**

**ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՐԴԻ ԿԱԶՄՈՒՄ ԸՆԴԳՐԿԵԼՈՒ ՀԱՄԱՐ  
ԻՐԱՎԱՍՈՒ ՄԱՐՄՆԻ ԿՈՂՄԻՑ ՆԵՐԿԱՅԱՑՎԱԾ ԹԵԿՆԱԾՈՒԻ ԳՆՈՒՄՆԵՐԻ ՄԱՍԻՆ  
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՍԴՐՈՒԹՅԱՆ ԻՄԱՑՈՒԹՅԱՆ ԳՆԱՀԱՏՄԱՆ  
ԹԵՍՏԱՎՈՐՄԱՆ ԱՆՑԿԱՑՄԱՆ ԿԱՐԳԸ ՀԱՍՏԱՏԵԼՈՒ ՄԱՍԻՆ**

Հաշվի առնելով <<Գնումների մասին>> Հայաստանի Հանրապետության օրենքի 46-րդ հոդվածի 1-ին մասի 2-րդ կետը, Հայաստանի Հանրապետության կառավարության 2011 թվականի փետրվարի 10-ի թիվ 168-Ն որոշման 105-րդ կետը և ղեկավարվելով Հայաստանի Հանրապետության կառավարության 2008 թվականի մայիսի 15-ի թիվ 503-Ն որոշմամբ հաստատված Հայաստանի Հանրապետության ֆինանսների նախարարության կանոնադրության 14-րդ կետի 1-ին ենթակետով,

**ՀՐԱՄԱՅՈՒՄ ԵՄ**

1. Հաստատել գնումների բողոքարկման խորհրդի կազմում ընդգրկելու համար նորավասու մարմնի կողմից ներկայացված թեկնածուի՝ գնումների մասին Հայաստանի Հանրապետության օրենսդրության իմացության գնահատման թեստավորման անցկացման կարգը՝ համաձայն հավելվածի:
2. Սույն հրամանն ուժի մեջ է մտնում պաշտոնական հրապարակման օրվան հաջորդող տասներորդ օրը:

Ժամանակավոր պաշտոնակատար

Պ. ՍԱՖԱՐՅԱՆ

**ԿԱՐԳ**

**ԳՆՈՒՄՆԵՐԻ ԲՈՂՈՔԱՐԿՄԱՆ ԽՈՐՀՐԴԻ ԿԱԶՄՈՒՄ ԸՆԴԳՐԿԵԼՈՒ ՀԱՄԱՐ ԻՐԱՎԱՍՈՒ ՄԱՐՄՆԻ ԿՈՂՄԻՑ ՆԵՐԿԱՅԱՑՎԱԾ ԹԵԿՆԱԾՈՒԻ ԳՆՈՒՄՆԵՐԻ ՄԱՍԻՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՍԴՐՈՒԹՅԱՆ ԻՄԱՑՈՒԹՅԱՆ ԳՆԱՀԱՏՄԱՆ ԹԵՍԱՎՈՐՄԱՆ ԱՆՑԿԱՑՄԱՆ**

1. Բողոքարկման խորհրդի (այսուհետ՝ խորհուրդ) կազմում իրավասու մարմնի կողմից ներկայացված թեկնածուն ընդգրկվում է գնումների մասին Հայաստանի Հանրապետության օրենսդրության իմացությունը գնահատվելուց հետո, եթե վերջինս ունի բարձրագույն կրթություն և առնվազն 3 տարվա մասնագիտական գործունեության փորձ: Գնահատումն իրականացնում է Հայաստանի Հանրապետության ֆինանսների նախարարությունը (այսուհետ՝ Նախարարություն)՝ թեստավորման միջոցով: Թեստը կազմվում է գնումների հետ կապված հարաբերությունները կարգավորող իրավական ակտերից:
2. Թեստավորումն անցկացվում է թեկնածությունը ներկայացվելու դիմումը Նախարարություն մուտքագրվելու օրվան հաջորդող տասներորդ աշխատանքային օրը: Թեստավորման օրվա, ժամի և վայրի մասին թեկնածուն ծանուցվում է թեստավորումից առնվազն քառասունութ ժամ առաջ:
3. Թեստավորումն անցկացվում է էլեկտրոնային եղանակով՝ համակարգչային ծրագրի միջոցով: Թեստում յուրաքանչյուր հարց ունի չորս ենթադրյալ պատասխան, որոնցից միայն մեկն է ճիշտ պատասխանը:
4. Թեստերը յուրաքանչյուր մասնակցի համար կազմվում են թեստավորման անցկացման օրը՝ դրա անցկացումից անմիջապես առաջ, համակարգչային ծրագրի միջոցով՝ պատահական ընտրության սկզբունքով, մասնակիցների և լիազոր մարմնի ներկայացուցչի ներկայությամբ:
5. Թեստավորումն անցկացնելու համար կազմվող թեստում ներառվում է 50 հարց: Թեստավորման տևողությունը սահմանվում է 75 րոպե:

6. Թեստավորման մասնակցի մուտքը քննասենյակ թույլատրվում է միայն անձը հաստատող փաստաթղթի առկայության դեպքում: Նախարարության ներկայացուցիչը ստուգում է մասնակցի ինքնությունը և վերջինիս անձնական տվյալների հավաստիության դեպքում թույլատրում մասնակցել քննությանը: Մասնակիցներին թույլատրվում է մուտք գործել թեստավորման սենյակ թեստավորման մեկնարկից առնվազն 10 րոպե առաջ, իսկ թեստավորմանը նշված ժամկետից ուշ ներկայացած մասնակցին արգելվում է մուտք գործել թեստավորման սենյակ: Մասնակցին չի թույլատրվում թեստավորման ընթացքում երկխոսության մեջ մտնել մյուս մասնակիցների հետ, օգտվել այլ համակարգչից՝ բացառությամբ թեստի համար նախատեսվածից, հեռահաղորդակցության միջոցներից, իրավական ակտերից և այլ փաստաթղթերից, մասնագիտական գրականությունից, տեղեկատուներից, ծածկաթերթիկներից, ինչպես նաև դուրս գալ թեստավորման սենյակից:

7. Սույն կարգի 6-րդ կետի պահանջներից որևէ մեկի խախտման դեպքում թեստավորման մասնակիցը հանձնաժողովի կողմից դուրս է հրավիրվում թեստավորման սենյակից, ինչի մասին կազմվում է արձանագրություն, որի պատճենը, մասնակցի ցանկությամբ, անհապաղ տրվում է իրեն: Այս դեպքում թեստավորման մասնակցի աշխատանքը ճանաչվում է անվավեր և գնահատվում է 0 միավոր:

8. Թեստավորման անցկացման համար սահմանված ժամանակը լրանալուն պես Նախարարության ներկայացուցիչը հայտարարում է սահմանված ժամանակն ավարտված լինելու մասին, որից հետո թեստավորման մասնակիցը դադարեցնում է թեստի լրացումը:

9. Համակարգչային ծրագիրը թեստի յուրաքանչյուր հարցի ճիշտ պատասխանը գնահատում է 1, իսկ սխալ պատասխանը՝ 0 միավոր: Սխալ պատասխաններ են համարվում ոչ ճիշտ պատասխան նշելը, մեկից ավելի պատասխան նշելը և որևէ պատասխան չնշելը:

10. Թեստավորումը հաղթահարելու համար թեստավորման մասնակիցը պետք է ստանա առնվազն 35 միավոր:

11. Թեստավորման արդյունքները հրապարակվում են թեստն անցկացնելու օրը:

12. Թեստավորման արդյունքների բողոքարկման հետ կապված հարաբերությունները կարգավորվում են «Վարչարարության հիմունքների և վարչական վարույթի մասին» Հայաստանի Հանրապետության օրենքով:

13. Թեստավորումը հաջողությամբ հանձնած մասնակիցները թեստավորման արդյունքները հրապարակվելու օրվան հաջորդող երկու աշխատանքային օրվա ընթացքում ներառվում են գնումների բողոքարկման խորհրդի անդամների ցուցակում:

14. Թեստավորումը հաջողությամբ չհանձնած, թեստավորմանը չներկայացած, ինչպես նաև սույն կարգի 7-րդ կետում նշված դեպքերում թեստավորման մասնակիցը ընդհանուր հիմունքներով նորից կարող է մասնակցել թեստավորմանը՝ վերջինիս թեկնածությունը իրավասու մարմնի կողմից կրկին ներկայացվելու դեպքում:

15. Թեստավորման արդյունքները պահպանվում են հինգ տարի, որից հետո դրանք Հայաստանի Հանրապետության օրենսդրությամբ սահմանված կարգով հանձնվում են արխիվ: